

# UVODNIK

## OBRAZOVAN I ODGOVORAN ČOVJEK TREBA I MORA BITI MORALAN ČOVJEK – U OBRAZOVANJE I NAUKU NE SMIJU SE UKLJUČIVATI AKADEMSKE NAKAZE I AKADEMSKI MEDIOKRITETI

Poštovani čitaoci i autori, čast nam je i zadovoljstvo predstaviti tridesetpeti broj Vašeg i našeg časopisa Defendologija. Već sedamnaestu godinu za redom, sa istim entuzijazmom i vjerom u snagu pisane riječi, naučnu misao, kritičko promišljanje društvene stvarnosti na tragu Horhajmerove kritičke teorije i ubjeđenja da su obrazovanje i naučno-istraživački rad ključni uslovi društvenog napretka – redakcija Defendologije nastavlja sa kontinuitetom u svom radu. Kao što je javnosti poznato, Defendologija je časopis Evropskog defendologija centra za naučna, politička, ekonomska, socijalna, bezbjednosna, sociološka i kriminološka istraživanja. Evropski defendologija centar je naučno-istraživačka organizacija osnovana 1997. godine i bavi se društvenim istraživanjima, organizovanjem naučnih konferencija, okruglih stolova, izdavačkom djelatnošću i svim drugim vidovima naučnog, obrazovnog i stručnog rada. Od svog osnivanja pa do sada, Evropski defendologija centar postao je prepoznatljiv ne samo na prostoru Republike Srpske i Bosne i Hercegovine, već i u širim međunarodnim okvirima kroz naučnu, obrazovnu i stručnu saradnju sa naučnim i stručnim institucijama. Danas, sagledavajući ostvarene rezultate, sa ponosom možemo reći da je Evropski defendologija centar time utkan u istoriju naših prostora kao objektivan, nepristrasan posmatrač i tumač društvenih zbivanja, neopтереćen ideološkim konformizmom i političkom pripadnošću. Ostali smo vjerni ideji nauke, struke i istine. Latinska izreka kaže „**Istorija je svjedok vremena, svjetlost istine, život uspomene, učiteljica života, vjesnik davnine.**“ (*Historia est testis temporum, lux veritas, vita memoriae, magistra vitae, nuntia vetustatis*) Našim radom želja nam je da generacijama koje dolaze u kulturno nasljeđe ostavimo misli i djelo jednog vremena i poruku da se samo dijalogom i tolerancijom, međusobnim uvažavanjem, vladavinom prava gradi društvo satkano od različitosti, a ne isključivošću, netolerancijom, otvorenom mržnjom, primitivizmom, nepotizmom, političkom i ljudskom nekorektnošću. U vrijeme devalvacije društvenih vrijednosti kao posljedice političke, ekonomske, kulturne, moralne i svake druge krize, u vrijeme društvene stagnacije i erozije u Bosni i Hercegovini, kritička misao o društvu i društvenim prilikama je posljednja nada da je pravednije društvo moguće, nudeći konkretne poglede i načine za prevazilaženje brojnih društvenih problema.

U ovom broju sadržani su radovi različite tematike imajući u vidu multidisciplinarni karakter časopisa. Obradene su teme u vezi sa konfliktima na Balkanu sa posebnim osvrtom na Makedoniju. Pitanje konflikta na balkanskim prostorima uvijek je aktuelna i izazovna tema, posebno imajući u vidu činjenicu da subjektivan pristup ovom pitanju nije rijetkost i da rezultati istraživanja često zavise od ideološke pozicije autora. Tu je rad koji se bavi pitanjem konflikta u Bosni i Hercegovini, kritički i argumentovano preispituje mogućnost demilitarizacije u Bosni i Hercegovini, postavljajući ključno pitanje da li je to utopija ili stvarnost. U nedostatku životnog smisla i bezperspektivnosti mladih, nedostatku opšteg okvira vjerovanja i orijentacije, nameće se pitanje djelovanja destruktivnih sekta i kultova koje privlače mlade. To je tema narednog rada u ovom broju. Zatim, slijedi rad o uticaju socijalnog kapitala na razvoj demokratije. Povjerenje i povezanost različitih društvenih grupa vrlo je značajna tema ukoliko se posmatra bosansko-hercegovački kontekst. Istraživanje socijalnog kapitala u politički, etnički i vjerski podijeljenim društvima ima naučni i praktični značaj. Na kraju, slijede radovi o metodi analize sadržaja u analizi štampe i rad u vezi sa sportom. Kao što se vidi, različitosti i različiti pristupi su bogatstvo a ne hendikep. Mi ćemo nastaviti njegovati taj pristup, nastaviti akademsku borbu da se nauci i obrazovanju vrati obraz koji je izgubljen u vremenima današnjih ne vremena. Borićemo se za novi svijet, prijatan svijet, gdje će čovjek moći da radi, mladost imati budućnost, a starost bezbjednost. Diktatori su oslobodili sebe, a porobili narod. Borimo se da oslobodimo narod, da ukinemo nacionalne barijere, pohlepu, kriminal, korupciju, mržnju i netoleranciju. Borimo se za razuman svijet, svijet poštenja, pravde, nauke, obrazovanja i napretka koji će svima donijeti sreću. **U ime demokratije, u ime boljeg života, na predstojećim parlamentarnim izborima u Republici Srpskoj i Bosni i Hercegovini, ujedinimo se svi na putu slobode, pravde, istine i poštenja.** Ne dozvolimo da nas nauka i obrazovanje napravi ciničnim a intelekt bezdušnim, ne dozvolimo da pohlepa zatruje naše duše, da nas vodi u patnju. Svima treba HUMANOST... **Prevare prolaze, diktatori umiru, a vlast oduzeta od naroda mora i treba biti vraćena narodu...**

**Glavni i odgovorni urednik**